

GRATULATIO
Senatoriæ Dignitatis
ILLUSTRISSIMO
& EXCELLENTISSIMO
DOMINO
D. FRANCISCO SALESIO

in POTOK

POTOCKI


PALATINO VOLHYNIÆ

Equiti Aquilæ Albæ

Dum primùm in frequentia Procerum, totiusque Nobilitatis
Palatinatûs sui Metropolim adiret
ab Obligatissimo Fundatori suo Liberalissimo
Collegio VARENZENSII *Scholarum Piarum* Studii & Ob-
servantiæ suæ testificandæ causâ

FACTA

Anno Æræ Christianæ MDCCLV.



VARSAVIÆ
Typis S. R. M. & Reipublicæ in Collegio
Scholarum Piarum.

In Insignia Armorum
ILLUSTRISSIMÆ DOMUS
POTOCCIANÆ



589947 III

Crux Constantino multos dedit una triumphos,
Hæc eadem multis vita, salusque fuit.
Quæ speranda salus Patriæ, Domuique, Tibique,
Tres in PILAVA si geris usque Cruces?



PANEGYRICUS.



SI quando universa Respublica, omnesque Cives incredibili quâdam visi sunt perfundi voluptate, tunc certe potissimum, cum Te, JLLUSTRISSE PALATINE, Senatoria dignitate ab AUGUSTO III. justo virtutis & meritorum Judice exornatū in ultimo Senatūs Consilio didicerunt. Statim enim ac hæc totō Regnō percrebuit fama, esse Te in amplissimum Senatorum Regni Ordinem cooptatum, tanta omnes, quibus Tuus in Patriam amor probè perspectus est, incesserunt lætitiâ, ut ex hac dignitatis Tuæ amplificatione mox ea sibi polliceri bona non dubitârint, quæ ab Optimis veteris illius Reipublicæ Senatoribus vel sperari desiderarive possint, vel laudari consveverint. Ea enim est, fuitque sēper de Te præclara omnium opinio, nullum Te aut Patriæ amantiorem, aut dignitatis Reipublicæ augendæ studiosiorem, aut defendendæ libertatis vindicem & propugnatorem acriorem hâc tempestate haberi. Quamobrem cunctorum Civium

A

à com-

à cōpluribus jam annis id in votis erat, ut Te quantocius
eō in Republica locō viderent, ex quo Tu, veluti ex qua-
dam specula universorum saluti, integritatiquē prospiceres,
studiorumque Tuorum in Rempublicam magis magisque
declarandorum uberiores nancisceris copiam. Quod-
si universi, qui hujus Patriæ solō continentur, id ita de Te
senserunt, id optârunt, idque jam evenisse majorem in
modum gaudent; quid verò de clarissima Volsyniæ Pro-
vincia judicandum sit? quō illa non diffundatur gaudiō,
cum Te sui Senatūs, Equestrisque Ordinis Principem esse
sibi à Deo & Rege concessum intelligit, totamquē se in-
comparabili prudentiæ Tuæ dirigendam ultro alacriter-
quē committit? Certe lectissimus hic Luceoriæ Nobilita-
tis concursus, hæc tanta populi frequentia, totiusque Civi-
tatis ac omnium Provincialium effusa multitudo, quæ Ti-
bi obviam occurrit, Teque certatim salutat, nullum Tibi
locum dubitandi relinquit, Provinciam hanc aliis amplis-
simis, fortissimis, locupletissimisque, totō Imperiō parem,
Te Palatino, Te Duce, ultra quàm verbis possit exprimi,
lætari, tripudiare, exultare. Sed sit hoc jam sacrum per-
petuumque famæ ac celebritatis Tuæ ad posteros monu-
mentum, æquē perinde totam Rempublicam, atque hanc,
cujus Comitibus es præfectus, Provinciam, de Tuo honore,
deque Tuo ad primam Volsyniæ curulim delectu vehe-
menter gaudere.

Enimvero quid mirum tanta animorum consensione
probari Palatinos fasces Tibi esse à sapientissimo collatos
Principe? Scimus enim permultos fortasse præter aliquam
nominis claritudinem non ab ullis in Rempublicam meri-
tis, sed ab ipsis, quos gratia Principis consecuti sint, titulis,
purpuris, & honoribus, decus omne, omnemque derivare
lucem; à Te vero Purpuræ ipsi Senatoriæ lumen maxi-
mum decusque afferri. Honori ipsi honorificum est, quod
Tu illum susceperis. Tu potius Senatoriæ dignitati, quàm
illa Tibi, splendorem addidit. Hæc de Te præstantissi-
ma, communisque omnium cogitatio, hoc illustre judici-
um, tantum mihi, fateor, voluptatis attulit, ut rem hanc
pro præcipuo Orationis meæ argumento, quam nomine

Colle-

Collegii nostri Varenzensis Tibi obligatissimi instituen-
dam suscepi, assumere non dubitarem.

Erit fortasse nonnemo, qui me in hoc novo dicendi
genere laborantem reprehendat, quod cum Senatoriam
dignitatem in Te celebrandam susceperim, quasi mutatis
velis ad id tractandum me subito converterim, quod alie-
num quodammodo ab instituto Orationis meæ cursu
videtur. Quid enim sibi volunt, inquiet ille, hæ tam
inuitatæ omnium lætitiæ, tam inauditi totius Poloniæ ap-
plausus, & gratulationes, si nihil PALATINO splendoris
Senatoria dignitas tribuit? Unde hæc ipsa gratulatio, quam
illi instituere paras? in aliud potius, quam hoc, rejicien-
da erat tempus, si Jllum laudibus Tuis, & non honorem
hunc, quem illi omnes in præsentia gratulantur, in Eo ce-
lebrare intendis. Ad quæ quidem omnia, quicumque de-
mum ille fuerit, qui mihi talia obijcere in animo habue-
rit, si modo patienter JLLUSTRIS: PALATINE audire
me volueris, quod profecto ad majorem Tibi cedit glori-
am, ita respondebo.

Non me latet quanta dignitas sit Senatorem agere,
& Cicero clarissimum illud cum ob eloquentiam, tum sum-
mam rerum gerendarum experientiam Romani Impe-
rii lumen, qui totus in hoc Magistratu consenuit, multis
in locis ita illius excellentiam & præstantiam celebravit,
ut Reipublicæ nostræ, quæ tota fere ad Romanam confor-
mata esse videtur, ad asserendam Senatoriæ dignitatis au-
thoritatem, si domestica (a) non haberemus, sapientissima
illius sufficerent testimonia. Novi, inquam, quàm gra-
vissimum sit Senatoris munus, neque ad conservandam
sustentandamque Reip: integritatem quidquam illò aut
utilius aut salubrius reperiri posse censeo, illudque ipsum,
A 2 quod

(a) Præcis temporibus viva lex erat,
Rex sive Princeps; Qui cum unus in
tam amplo Regno omnia neque præ-
stare, neque providere, ac ne judiciorum
quidem difficultates recte explicare pos-
se videretur, & lubricus autem procli-
visque ad Tyrannidem gradus in sum-
ma potestate esse soleat, adhibiti sunt,
ei Senatores sive Consilarii, qui & Con-

filia, actionesque ejus ad salutem Reip:
& judicia ad justitiæ & æquitatis trutinam
dirigerent, & monitis consiliisque
salubribus, quasi vivis quibusdam legi-
bus pro re nata cum animum ejus in-
formarent, tum potestatem modifica-
rentur. *Cromerus de Rep: & Magi-*
stratibus Polonorum.

quod Tullius de Amicitia, ego de Senatoribus asserere non vereor: eos nimirum de Rep: velle tollere, idem esse, ac tollere solem è Cælo. Illi enim sunt, qui Rempublicam saluberrimis suis consiliis ad incrementum alunt, immanissimos hostes prudentiæ & sapientiæ suæ vi à finibus illius arcent & propulsant, leges ne corrumpantur custodiunt, vitia ne virulento suo halitu totam optimorum Civium corrumpant massam, castigant & abradunt, virtutes foveant, totamque Reip: molem, ne labatur & ad interitum vergat, quasi quibusdam humeris sustentant. Illi inquam, splendorem Reip: tribuunt, dignitatem augent, & pulcherrimis suis factis gloriam immortalem conciliant. Neque enim Lacedæmoniorum, Atheniensium, Romanorum, aliasque florentissimas nosceremus Respublicas, nisi illas clarissimi illi Viri, quos Atheniensibus Archontes, Spartanis Ephoros, Romanis denique à gravitate senectutis Senatores appellare placuit, suis sapientissimis munivissent legibus, saluberrimis firmassent institutis, pulcherrimisque illustrassent factis. Hinc tanta cum ubique, tum in hac nostra clarissima hac ætate Polona Republica Senatorum fuit veneratio & autoritas, ut quidquid illi juberent, id omnes amplecti, in eorumque sententiam pedibus ire non vererentur, quod salutem integritatemque suam & Reipublicæ, in eorum dignitate, consiliis, & præceptis sitam esse non dubitarent. Cæterum omnia hæc præclara Senatorum decora & ornamenta quamvis semper tam excelsa & magnifica ab omnibus haberentur, ut nihil deesse illis videretur, qui in hoc facerrimo censerentur ordine, plures tamen legimus, qui hoc conspicui honore, tantis Rempublicam suam affecerunt calamitatibus, ut illa propter summam eorum dominandi libidinem, scelestissimamque vivendi licentiam etiam de salute sua periculum faceret. Qua in re ne longe exēpla repetam: Sulla & Marius ambo Consules, Catilina vero Senator Romanus fuit; quid vero illis hæc ornamenta honorum splendoris attulerunt? ecce hic latro & incendiarius Patriæ, illi vero ex Consulibus hostes Reip: & teterrimi carnifices effecti immanissimis suis suppliciis adeo Romanum exhau-

exhauserunt sanguinē, ut maioriē prope partem Civium ē
vivis sustulerint. O! præclaros Senatores, ex quibus Res-
publica tales ac tantos meruit habere Tyrannos, illo-
rumque illustrare studendo nomina, sibi induxit te-
nebras & squallorem. Quid Wsieborio in annalibus
nostris aut lectu aut memoratu potest esse fædius, qui Cri-
voustum Ducem nostrum tot victoriis ex variis Gentibus
populisque relatis inclytum in acerbissima illa ad Halici-
am pugna turpi probrosaque deseruit fuga? & tamen ille
Palatini Cracoviensis munere functus in Senatorum cen-
sebatur numero. Quid? in fædissima illius actione, attu-
litne illi quidquam splendoris Senatoria dignitas, quam
primam in Polonia tunc nostra obtinuit? profecto in tam
turpi facto neque præsidio illi fuit, neque eum ab igno-
miniosa servavit morte. Sed ne in uno hæere solum vi-
dear, & dum splendorem hominibus non à Magistratibus
accedere contendo, ne Senatoriam dignitatem argumentis
elevare & extenuare videar, lubet ad alios transire, & in
majoribus idem fere contingere honoribus est animus in-
dicare. Quid Nerone illo turpius aut natura in lucem
edere, aut terra immanius monstrum procreare potuit, cu-
jus risus lachrymas populo eliciebat, lætitia gemitum con-
citabat, furor denique divina humanis permiscebat? illum
tamen ex Nobilissima Juliorum Familia procedentem Im-
peratorem florentissimæ Romanorum Monarchiæ fuisse
accepimus. Quid autem Imperatoria dignitate aut ex-
cellentius quidquam aut honorificentius in mundo illō
ævō fuit? de illa tot clarissimi Viri inter se armis dimi-
cabant, ut saltem uno die illius degustarent svavitatem;
illam adeo sublimi collocabant loco, ut Divinos etiam illi
deferre non dubitarent honores. At vero Nero non hu-
mano sed stygio potius semine procreatus ex tam præstan-
tissima dignitate quid emolumenti retulit? mutuavitne sibi
hunc splendorem, quem illa habere ab omnibus credi-
ta est? compescuitne vesanum illum furorem, animi-
que belluinam ferociam, ad quam à natura propendere
visus est? minime vero; sed eos, quos à pueris hausit
spiritus, usque ad virilem retinuit ætatem, & in quibus

sceleribus vixit Nero, in iisdem mortuus est Imperator. Jam vero Lubomirios, Potoccios, Mieleccios, Zamoyscios, Czarneccios, Koniecpolios, innumerabilesque alios clarissimos Patriæ nostræ Imperatores, qui Rempublicam hanc stabiliverunt, armisque defensam, & ex faucibus hostium non semel ereptam, tranquillam, florentemque posteritati reliquerunt, in quibus recensendis ex Romanis Brutos, Decios, Ahalas, Gracchos, Scipiones, Lentulos in Deorum numero ac cætu collocatos, ex Græcis vero Miltiades, Themistocles, Epaminondas Divinis honoribus affectos non est mihi opus ut commemorem, eorumque pulcherrima facta, disciplinæ militaris scientiam, bellicasque artes cum istis comparem, semper enim Patria nostra totum hunc suum, quem habuit & habere potest splendorem illis in acceptis referet, eorumque nomina & facta summis celebrabit laudibus; quid quæso ad hunc, in quo nunc sunt, gloriæ evexit apicem? quid illis tantam etiam apud barbaras gentes conciliavit venerationem, ut hucusque eos commemorare, & fortitudinem, dexteritatem, cæterasque eximias eorum virtutes prædicare non erubescant? Virtus profecto claros eos effecit, virtus eam, quam habent, dignitatem illis tribuit, virtus eorum Magistratibus, quos gloriose gesserunt, splendorem attulit, ut non Senatores tam pulcherrimis Poloniam rebus illustrasse, sed eorum virtutem iismetipsis, Poloniæquæ lucē attulisse omnibus sit in confesso. Sed ut jam illuc, unde paulo ante digressa est oratio mea, redeam, vide quæso JLLUSTRIS: PALATINE, quo rem hanc totam deducam.

Cum ex his, cæterisque aliis Historiarum exemplis, quæ, longus nimium essem, si singula oratione persequi cuperem, liquido constet, alios quamvis maximis honoribus fulgentes, infames tamen officinasque vitiorum fuisse, alios vero clarissimos honestissimosque extitisse; atque adeo alteros obscurasse, alteros illustravisse Magistratus, quos gesserant, tantumque illis, quantum ab aliis detractum esset, splendoris addidisse, hinc itaque jam manifesto sequitur, quod fateri omnino necesse sit, non homines ab hono-

honoribus, sed honores ab hominibus, si ii probi sint, illustrari consuevisse. Honor enim honoratum solum non probum efficit, probitas autem honorem commendat; atque uti umbra sine sole, ita honor absque virtute intelligi & concipi nequit. Quod si honores præmia virtutis sint, nullique alii ad hunc summum ordinem, ut Tullius de Senatoribus loquens inquit, aditus pateat, nisi industriæ atque virtuti; honorẽ proinde toties is imminuit, qui eum sine virtute gerit. Tunc enim solum clarior & illustrior honor resplendet, cum ad eum sapientiæ, prudentiæ, consilii, cæterarumque virtutum comitatus, conformatioque quædam morum accedit, quæ omnia si illi detraxeris, non honorem, sed inane simulacrum honoris efficies, nihilq; in Te præter titulum honoris habebis.

Quod cum ita sit, jam adversarii mei argumentis satis factum esse credo; ac proinde perfacilis mihi totius orationis cursus, à quo me harum rerum tractatio paululum abduxit, ostenditur, cò itaque, quò institui, vela orationis meæ converto: atque id imprimis à Te JLLUSTRIS: PALATINE peto, ne, dum Te in Senatoria dignitate laudibus effero, Teque illi splendorem tribuere contendo, Senatoriam dignitatem à me obscurari & extenuari putes; tantum enim à me abest, ut istam cogitationem aliquando in me admittam, ut potius omnes ingenii mei vires in id intendam, quo ex Tuarum virtutum fulgore illius demonstrem splendorem. Dum enim assero Te dignitati Senatoriæ, non illam Tibi splendorem tribuere, per hoc evincere conor, Te omnia illa animi ornamenta, quibus illam cum summa Tua gerere possis gloria, ad eam Tecum adferre, non vero ab ea mutuari. Semper enim in hac sum fuique sententia, quod Senatorem esse nihil sit in hac nostra Rep: aut honorificentius, aut dignius, Tua me nonnisi gravitas, sapientia, & magna virtutum omnium varietas ab hac opinione revocavit, ut id in Te celebrare mihi proposuerim, ex quo Tibi dignitatem Senatoriam commendare debueram: quod tanto libentius facio, quo uberiores de Te dicendi, honorisque hujus in Te celebrandi nanciscor copiam. Ex hac enim

præstantissimarum laudum Tuarum tractatione, quantum Tibi gloriæ, tantum etiam honori Tuo splendoris accedet, quod is sis, qui eum egregie sis gesturus, & factis, consiliisque Tuis abunde illustraturus. Sed ne ejusmodi res verbis exaggerando littus solum, ut ajunt, legere videar, ut in altum pulcherrimarum laudum Tuarum me conjiciam, jam tempus mihi instare sentio. Quare dum Generis Tui claritatem, meritorum magnitudinē, virtutum denique omnium compendium in Te oratione celebrare intendo, ex his tribus quantus Tuæ huic dignitati, totique Senatorio Ordini accedat splendor, jam me attentè audire, sicuti hactenus fecisti, pergas.

Qui de moribus, vitæque Civili scripsere, quamvis primo loco eam laudem, quæ virorum propria sit, à virtute sumendam censuerunt, non in postrema tamen classe eam posuere, quæ à Nobilitate Generis profiscitur. Intelligebant namque sapientissimi Viri non minus lucis ac splendoris virtutem generi, quam Nobilitatem Generis asferre virtuti. Quæ eorum verissima sententia adeo omnium hominum insedit mentibus, ut nemo jam modo sit, qui claritatem generis inter maxima fortunæ bona non collocet. Eo magis tamen in hac sua confirmari videntur opinione, quo magis experientiâ certissimâ rerum omnium magistrâ discunt, imbelles ex imbellibus, ex fortibus vero fortes provenire Viros. Quod quidem nemini mirum videri debet, si penitus rem hanc introspicere voluerit. Nam si in brutis animantibus, in plantis, atque arboribus ita naturâ comparatum videmus, ut ea plerumque seminariam vim bonitatemque referant, quanto magis id consentaneum est usuvenire hominibus, quibus & natura & disciplina datum est, ut majorum suorum imagines agnoscere eorumque præclara facta sibi ad imitandum possint proponere? Non frustra certe Romani illi veteres, à quibus plurima ad nos, & pulcherrima vitæ instituta manarunt, atria ædium, porticusque Majorum imaginibus ornabant, easque in funerum pompa circumferebant, nisi ut ostenderent, quantum Nobilitati sit deferendum, quantusque illi honor sit habendus. Ingentes enim

enim sunt ad virtutem stimuli majorum laudes, factaque fortia. Hinc si Militiadis trophæis è somno excitari Themistoclê accepimus, quanto magis excitari, & ad optima quæque agenda accendi debent ii, quibus intra domesticos parietes, quocunque se vertant, occurrunt monumenta virtutis & gloriæ? Quare si quod est tantû beneficiû, quod Deo Op. Max. acceptum referre debeamus, certe illud est præcipuum, si summo & illustri loco nascimur. Tu itaque ILLUSTR: PALATINE si quid habes, unde potissimum lætari & gloriari possis, profecto illud erit maximum, quod tam Nobilissimæ clarissimæque genus & originem Tuam debeas Familiæ. Natus es enim in illa Domo, quæ statim ac in Polonia florere cæpit, arx quædam semper & propugnaculum libertatis fuit, ex qua, veluti ex equo Trojano, tot clarissimi belli pacisque artibus insignes prodiere Viri, qui Remp: hanc nostram tantis auxerunt meritis, illustrarunt virtutibus, & ad eum gloriæ egregiis suis factis evexerunt apicem, ut illorum consiliis, fidei, vigilantia, dexteritati omnem suum in acceptis referat splendorem. Fuerunt quidem semper Viri conservandæ Patriæ amore flagrantissimi, Imperatores defendendæ illius studiô clarissimi, Senatores vindicandæ ab interitu saluberrimis suis consiliis Reipublicæ studiosissimi, sed ut interrupta Familiæ serie eô in Patriam ferrentur studiô, ut eam consilio, labore, industria juvarent, armis, totisque corporibus semper protegerent, hoc præter Vos concessum est nemini. Quod enim per Deum immortalem tale fuit unquam in Polonia tempus, quô omnes Ordines Vestrorum Nominum pleni non essent? quod bellum absque Vobis gestum? quæ consilia peracta, quibus Vos non interfuissetis, Vestramque sententiam non diceretis? Vos in bello fortissimi Imperatores, Vos in Senatu gravissimi Senatores, Vos in Curia disertissimi Oratores, in exercitu robustissimi Primipili semper estis observati; sine Vobis vana Consilia, elumbis eloquentia, anceps bellum & Victoria sunt visa. Nam ut inde repetam, unde omnis Vestrorum Nominum dimanat splendor, quamprimum Domus Vestra incrementa sua in Polonia sumere cæpit, cujus ori-

C

ginem

ginem ab ipso *Zyrosiao*, qui temporibus *Boleslai Crivou-*
sti in Polonia floruit, ducitis, tanta statim illustrium Vi-
 rorum semper fuit copia, ut illi omnes quodammodo pos-
 sidere dignitates, omnibusque Reip: negotiis pertractan-
 dis adhiberi digni habiti fuerint. Hinc sive periculum
 aliquod Patriæ instaret, ad illos de salute & fortunis Ci-
 vium dimicandi deferebatur provincia; sive de pace fæ-
 deribusque cum hoste paciscendis agendum esset, illorum
 fidei, prudentiæ, & industriæ hoc tam gravissimum com-
 mittebatur negotium. Longus profecto essem, si hac Ora-
 tione clarissimos ornatissimosque Gentis Vestræ Virós ab
 ipsa repeterem origine, & in recensendis pulcherrimis co-
 rum factis immorari cuperem; tanta namque est rerum
 ubertas, tanta Imperatorum, Senatorum, omnique hono-
 rum genere insignium multitudo Virorum, ut si illorum
 indicem texere vellem, in immensum proculdubio excre-
 sceret Oratio. Nihil itaque hic dicam de Alexandro pri-
 mo & præcipuo Gentis POTOCCIANÆ surculo *Zyrosiai*
 Filio, quem *Lokietkoni* nostro ita carum fuisse Historiæ
 Gentis nostræ memorant, ut nunquam à latere ejus disces-
 serit, & JOANNE (b) ejus Filio, qui in defendenda *Caroli*
Hungariæ Regis salute singularem suam fidem, & incre-
 dibilem ostendit fortitudinem. Nihil dicam de JANUS-
 SIO (c) *Cracoviensi* Palatino, & NICOLAO (d) Pro-Can-
 cellario Regni, quorum alter *Cracoviam* Regni sedem à
Conrado, alter *Vilnam* *Lithvaniæ* compendium à *Vitol-*
 do

(b) Felicianus quidam de *Zaachorū* familia, stricto gladio in *Cænaculo* *Caroli* Regē adortus, sed frustratus ictum dexteram modo ejus levi ictu perstrinxit, Regina quatuor digitos dextræ manus amputavit; filios vero prædagogi accurrentes objectu corporum suorum protexere. Mox parricida à Joanne Potoccio nobili Juvene prostratus concursu satellitum membratim dilsectus est. *Sarnicki Annal: Polon: libr: 6. sub an: 1330. Dlugosius quoque sic de eo habet: Joannes Filius Alexandri Potocki adolescens ingenuus, qui Dapiferi officioungebatur, Felicianum in Pueros Regios crudelitatis & necis ope-* *ra edere anhelantem, primus aggressus, sic ictu inter collum & scapulas inflicto repressit, ut corruens deflueret præceps in terram. (c) Eorum reditu cognito Palatinus advolat, & facta manu conjunctisque viribus Cracoviam in potestatem suam redigunt, ejecto Conradi præsidio. Cromerus lib: 8. (d.) Veritus est autem Vladislaus Rex ne Vitoldus Vilnâ, Russorum impensius illi faventi proditione per inscitiam & ignaviam Skirgellonis potiretur, misit Nicolaum Procan: Poloniæ cum mediocri Militum Polonorum præsidio & apparatu bellico, ut arcem utramque tueretur &c. Cromerus lib: 15.*

do oppugnatam servavit, armisque strenue defendit. Nihil dicam de ADALBERTO fortissimo Gentis Vestrae Viro, qui octuaginta annis, cum Valachis, Borussis, Tartarisque variis temporibus dimicando totus in armis consenuit; de MATHIA, qui eô erat ingenio, eruditione, & prudentia, ut Sigismundus Rex Filium suum adhuc impubere Sigismundum Augustum ejus curae instituendum traderit; de NICOLAO (e) Generali Terrarum Podoliae Praefecto, alteroq; NICOLAO (f) Palatino Bracławiae, qui inaudito sane ad posteritatis memoriam exemplo, dum cum Sigismundo III. Rege Smolensciam oppugnaret, primus muros civitatis illius conscendit, obsessosque tanta admiratione hoc facto suo pulcherrimo perculit, ut illi stationes suas deferentes diffugerint, facileq; nostris ad expugnandâ urbem opportunitatē dederint. Et quoniâ tam multorum clarissimorum Virorum laudes silentio praeterii, ne injuriam itaque illis facere videar, neque hic STANISLAI Palatini Cracoviae, qui Gustavum Svecorum Regem sub Sigismundo III. memorabili clade ad Gorzdnam affectum è finibus Patriae ejecit, Basiliumque Szeremetovium sub Joanne Casimiro Rege ad Ochomatovum Cudnovumque insignibus relatis victoriis profligavit; STEPHANI Bracławiae Palatini, qui pluribus, cum Turcis, Moldavis, Valachisque dimicando praeliis, semper victor ex acie redibat

C 2

bat

(e) Cum esset nobis per multa & varia eximiae virtutis exempla spectata fides atque integritas Generosi Nicolai Potocki, quam ab ineunte ætate sua adhuc Divo Parenti nostro in ejus aula educatus, deinde etiam in nostra per multos annos splendidissime versatus, testatam reliquit. Plurima insuper documenta egregii animi atque fortitudinis in militia pro tuendis finibus Regni nostri dispendia suscepta praebuit, adeo, ut omnium, & nostro judicio dignus existimatus est, ut inter alios Patricios Nobiles et strenuos Viros de Rep: bene meritos ad praemia meritorum virtutis vocaretur. *Ex Privilegio Sigismundi Augusti.* (f) Expertam centies animi pectorisque fortitudinem sinceritatis Tuae, quam nobis & Reip: una cum Tuis Fratribus nobis dilectis explicatam

else voluisti in gravi hostium excursione, praecipue vero Valachis & Tartaris hostiliter depalcentibus terras nostras, audaci semper fronte, nec sumptus nec vitae respectum habendo, animose, & cum admiratione multorum, nostroque fructu stetisti. Et in hac Motcovitica expugnatione ad Smolenscum nullum periculum retractasti, sed sponte jam ex subterraneis cuniculis igne sulphureo omnia depalcente, muros Smolensci, custodibus hostium repressis ipse personaliter conscendisti. Regimen quoque in Smolensciana arce commissum, recto consilio, prudentia, dexteritate perfecisti. Constituimus Tibi pro meritis regratificari, & initia praestando Palatinatum Bracławiensem &c. &c. *Ex Privilegio Sigismundi III.*

bat, JACOBI (g) Succamerarii Haliciensis, STANISLAI (h) primum Castellani Cameneciae post Palatini Bracławiae Regnique Campiducis strenuissimi; CHRYSOPHO-RI celebri sua ad Rudolphum II. Imperatorem Legatione clarissimi; NICOLAI Palatini Cracoviae, Supremique Ducis Exercituum Regni; PAULI Castellani Cameneciae
monu-

(g) *EPITAPHIUM quod in Ecclesia Buczacensi visitur.*

Siste parumper iter percutrens busta viator,
Perlege, sed maestus Sarmata iuge precor.
POTOCIUS recubat gentis generosa propago
Vandalitum, lapidis mole regente caput.
Quem Scythia, quem Valachus, quem Turca timebat iniquus,
Hunc brevis urna capit, pulvis & umbra tenent.

(h) Gessit in Patria illam ac talem occupationem, ut nedum generis sui claritatem incomparabili gloriâ superaret, & acceptam in Majoribus lucem ita novo virtutis splendore cumlaret, sed etiam si nobilissimæ Familiae decora antiqui non protulissent, summum Ille genti lux ornamentum extitisset. Nam post exercitam Juventutem in Academicis Regni, dum in cæteris nationibus perfectiorem literarum promotione, & linguarum experientia reddidisset, Achillem pectus sanguinis generositate bullientem ad negotia martialia convertendo, hostem Patriæ à Moldavis, Turcis, Scythis, Colacis, Molchis, Prussis congestum, vita & fortuna postposita, repressit fortiter & continuit. Ille cum Parente Ille Rokosianum tumultum diruperat; Ille Constantinum Palatinum Moldaviæ cum Ille suo Patruo Joanne, Regio jussu & Senatus consensu, in Principem firmaverat & stabiliverat; Ille Skinderbatæ potentiam in Cecora utque ad ultimum posse cum bellatoribus fortissimis represserat; Ille Turcarum agmina cum Osmano Imperatore non vacillanti pectore sustinuerat; Ille Tartarorum incursionem, ipsaque virium hostilium cunea, ad Bussam cum Zolkiewicio, ad pontem Bary cum Koniecpolcio fudit, dissolverat; Ille in Prussia à Supremo militum constitutus, in ca-

put Gustavianam fortitudinem paucis exercitu, & absentibus primis Rothmagnistris & Ductoribus, tam forti pectore debilitavit, ut recedere hostes, nec amplius turmas militum diffundere in nostros debuerint. Quid dicam de excursionem contra Tartaros, qui transiecto flumine Nestro, cum multa præda aufugiebant quos Ille una cum Fratre suo Capitaneo Camenecensi ad 15. millia insecutus fuit, plurimosque à captivitate liberatos, etiam in captivitatem Principes Scytharum acceperit? Quid referam, quàm forti animo cum Abasio Pala ad Studenciâ pugnaverit, & quàm potenter Colacos rebelles ad Niedzwiedzieloz, Boroviciam & Starzec expugnaverit? Sed quid tanti Viri laudes inops celebrabo, quem facta majora, actusque generosiores in dies magis ac magis commendant abundantius? Dicent posteris, & ampliori stylo Historici, quorum est majorum Virorum & excellenti virtute præditorum laudes celebrare; ut & illis quoad fieri potest pro meritis suis gratia referatur, & ceteri habeant, unde virtutis & laudis exempla petant, & quo ad bene merendum de suis incitentur: mihi vero ea vel primis labris attingere sufficiat. *Okolski Tom: II. pag: 407. Articuli Pi-lava.*

monumentis (i) à se luce publica donatis in Republica literaria clarissimi, Parentis septem Filiorum felicissimi, cæterorumque præstantissimorum Virorum res præclare gestas commemoro; adeo enim suorum factorum multorumque in Patriam meritorum pleni sunt libri, ut ea omnia in hanc Orationem conferre supervacaneum omnino esset ac inutile. Ad illos jam propero, qui hâc nostrâ ætate, hisque nostris floruerunt temporibus, factisque suis pulcherrimis ita omnium perstrinxerunt oculos, ut ad illustrandam claritatem Gentis vestræ nihil ipsis majus quidquam, aut præstantius adferri possit.

Atque ut initium dicendi sumam à THEODORO Primate primoque Regni Principe Archiepiscopo Gneznensi PAULI Castellani Camenecensis Filio, quem propter summam authoritatem & virtutis & Ordinis primo loco pono, quid illo illustrius ad commendationem Familiæ Vestræ esse potest? Is erat Princeps, cui pares paucos, meliores nulla ferent sæcula. Nos ipsi, quamvis multi eum non vidimus, ex his tamen, quæ de illo tam multa & præclara dicuntur, ita de eo optimè & honorificè sentimus, ut eum & admiremur & diligamus, neque cum illius fide, prudentia, gravitate, cæterisque pulcherrimis animi ornamentis quenquam conferendum esse putemus. Quid vero dicerent illi, qui illâ vixerunt ætate, qui illius facta actionesq; sunt cōtēplati? certè uno omnes faterentur ore, neque ad gerendam tantam tamque excellentiam & sublimem dignitatem quidquam illi defuisse, neque in rebus gerendis solertiolem, neque in literis doctiorem, neque denique in vita hac civili urbaniolem illô quenquam existisse. Erant enim in eo omnes dotes, quæ tanto Principe sunt dignæ. Gravitas cum comitate conjuncta, quæ prima hujus ordinis dos est, tanta in eo resplenduit, ut neque authoritatem suam à quopiam im-

D

minui

(i) Opera quæ in lucem publicam vulgaverat *Paulus*, Niesiecki Tom: III. pag. 703. Articulo *Poto.ki* sequentia recenset: 1^{mo} Exercitationes Oratoricæ lucubratur in secessu Patavino. 2^{do} Historico-Politicus, sive Quæstiones histo-

ricæ & civiles ex libris tribus Livii concinnatæ. 3^{tio}. Sæculum Bellatorum & Togatorum, seu Centuria clarissimorum Virorum Polonorum & Lithvanorum. 4^{to}. Moscovia, sive brevis narratio de moribus Magnæ Russorū Monarchiæ.

minui, neque Eam supra cæteros ita efferre passus sit, ut cæteris inde aliquid detraheret. Humanitatem, benignitatem, affabilitatemque ita coluit, ut idem semper esset, qui ante fuit, neque cum tanti accessione honoris immi- nuti in eo mores, sed aucta tantum dignitas apparuerit. Quanta vero sermonis dulcedine & elegantiâ, quantâ per- spicaciâ ac memoriâ, quàm aptis rationibus & postulata colligeret, & petentibus responderet, nemo unquam sine admiratione potuit audire. Observabat illud, quod est Principis proprium, ut sive concedendo, sive negando neminem à se tristem dimitteret. Quis vero tan- tâ facundiâ præditus, qui magnificas ac salutare ipsius de Rep: cogitationes appposito valeat explicare sermone? Omnem curam, mentem, diligentiamque suam in eo po- nebat, ut Patriam pacatam, tranquillam, florentemque semper videret, eoque omnia sua conferebat studia, unde illi maximum adferri posset decus & ornamentum. Pa- cis ita Studiosissimus semper erat amator & hortator, ut ad eam conservandam, libertatem defendendam, institu- ta Patria servanda omnes mirifice & consiliis & præceptis inflammaret. In Senatu si quid dicebat, tanta in verbis sententiisque elucebat erga communem hanc Pa- triam caritas, ut omnes mirum in modum accenderentur & ad amplectendum quod diceret, & ad probandum quod sentiret. Atque quemadmodum Optimi Senatoris partes, ut Princeps Senatûs, diligenter obire studuit, ita ut Anti- stes omnem curam, diligentiamque adhibuit, ut Sacris an- tiquus honos, cultusque debitus religioni deferretur. Cum- que innatam sibi quandam haberet bonitatem, quæ il- lum ad quascunque optimas actiones propensissimum red- debat, propterea in pauperes misericors, afflictorum non minus consolator, quàm Patronus liberalis ac beneficus, Dei & Sanctorum ejus pientissimus venerator fuit. Quid- quid verò à Sacris & forensibus occupationibus superfue- rat illi temporis, id totum amicis, quos omnes in Rep: habuit, Deo, quem ardentissime amabat, studiisque litera- rum, quarum maximus & cultor & Fautor erat, impen- debat. Cumq; in Rep: totum vitæ suæ cursum & agen- do

do & consulendo consumpsisset, gravi ætate confectus ut se in otium conferret, quasi ad tutissimum senectutis portum ad literas confugit. Quamvis autem Solonem, Catonem, Lucillum, aliosque clarissimos Viros senectutem suam studiis ita relaxare, ut Patriæ, amicorumque suorum oblivisci quodammodo viderentur, memoriæ proditum accepimus; Princeps autem hic noster ita moderatè in illis versatus est, ut licet nullam jucundiorē habuerit voluptatem in vita, quam libris impalescere, consortioque & consuetudine doctorum Virorum frui, nunquā tamen neque Patriæ, neque amicis privatō consiliō defuit. Sed hæc dū de tā ornatissimo spectatissimoq; Principe prædico lætor vehementer **JLLUSTRIS: PALATINE**, quod apud Te dico, qui id cogitatione potiùs, quā verbis æquari intelligis. Scis enim Tu ipse quis & qualis is Princeps fuerit, cujus laudibus celebrandis neque par Oratio assurgere, neque ita quidquam de illo, ut plus non desideretur, dici potest. Quare venio jam ad clarissimos Imperatores tria Gentis Vestræ lumina **FELICEM, ANDREAM & JOSEPHUM** omnes Cracovienses Castellanos, Ducesque Regni nostri strenuissimos, quorum egregia facta non modo Domui Vestræ, sed toti etiam Reip: plurimum lucis attulerunt.

Nam quis **FELICE** Stanislai Palatini Cracoviensis Filiō Avō Tuō, aut Sagō, aut Togā, aut rerum ab eo gestarum magnitudine clarior existit? Illum in bello fortissimum Imperatorem, in consiliis gravissimum Senatorem semper Patria est experta. Illi victorias, quas cum Georgio Lubomirio ex Hungaris, cum Czarneccio ex Moscis, cum **JOANNE III.** ad Chocimum ex Turcis, aliisque barbaris gentibus variis temporibus reportavit, in acceptis refert. Quamvis autem rebus à se belli pacisque tempore præclare gestis maximè clarus exstiterit, gloriam tamen hanc suam majorem in modum auxit in lectissimis Filiis suis: **MICHAELE** Palatino Vosthyniæ Patruo Tuo Tartarorum & Cosacorum Domitore validissimo, & **JOSEPHO** Excubiarum Regni Præfecto Patre Tuo Clarissimo, qui tantā prudentiā, consiliō, erudi-

tione rerumque gerendarum notitiâ excelluit, ut ad Eum in maximis suis periculis, veluti ad quoddam tutissimum emporium, Respublica semper confugerit. Hinc cum Regnum hoc plurimis malevolorum misceretur dissensionibus, armisque discinderetur civilibus, ad componenda partium studia, sopiendamque belli flammam à Republica delectus, ita omnia feliciter, sapienterque composuit, ut ejus operâ, studiô, & diligentia pax & concordia in Regno reffloruerint. Cæterum cum omnibus animi ornamentis apprimè instructus esset, maximamque Patriæ spem de se polliceretur, inopinata mors, quæ illum in ipso ætatis flore è vivis sustulit, quasi filum quoddam omnium honorum & dignitatum, quæ eum in Republica manebant, præcidit. Hòc unicò solum felicior extitisse visus est, quod Te Filium reliquerit, in quo Paternarum suarum virtutum imaginem ita effinxit, ut dignus factus fueris, non modo omnes illos honorum titulos, quos ille promeruerat, possidere, sed majores etiam alias præclarissimis Tuis de Republica meritis obtinere dignitates. Itaque si Sempronio Graccho quondam à Romanis, ut ex eorum historiis cognovimus, tantum eo nomine tributum est, quod ex Cornelia Africano viro magno nata, duos Gracchos Titum & Tiberium, summos illis temporibus Oratores procreasset: certè hic Tuus multo est præstantior, qui ex CETNEROWA nobilissima honestissimaque uxore sua, non Gracchos duo portenta Romanæ Reipublicæ, sed Te optimum hujus Reipublicæ Parentem generavit; ex quo tantum illi gloriæ & laudis accedit, ut, si nulla re ad posteritatis memoriam nomen suum transmisisset, hoc unicum ad immortalitatem asserendam satis illi sit, quod Pater Tuus exstiterit.

Jam vero de ANDREA FELICIS Avi Tui Fratrem, quibus ille Rempublicam ornarit meritis, multa haberem, quæ in medium proferre possem, sed cum non historiam scribere, sed virtutes solum nonnullas factaque præcipua Clarissimi hujus Imperatoris percurrere mihi proposuerim, illud itaque nonnisi, quod ad illustrandum illius nomen plurimum gloriæ adfert, hoc loco commemorandum statu-

statui: quod nimirum tanta is & autoritate, & existimatione in Republica fuerit, ut eum JOANNES III. Rex noster ad solvendam obsidione Turcarum Vindobonam profectus, omnium Ordinum consensu Pro-Regem constituerit, omnemque administrandæ Reipublicæ provinciam ad eum detulerit. Quod tam gravissimum honestissimumque munus quâ diligentia is obierit, satis superque sapientissimus Rex ipse declaravit, dum ex sua expeditione redux Regnum hoc non modo pacatum, tranquillum, ab omnibusque turbis remotum, sed ab hostibus etiam ipsis, qui Poloniæ fines crebris suis incursionibus lacecebant, armis illius repurgatum reperit, eumque in præmium laborum, meritorumque post Sieniavium paulo post vita functum Imperatoria dignitate exornavit. Quo quidem judicii & benevolentia suæ testimonio, non modo Princeps Optimus singulare illius in Patriam studium probavit, sed etiam quantum Nomini POTOCCIANO honoris & observantia deferendum sit, apertissime indicavit. Tanto Parenti non ab similis Filius JOSEPHUS Imperatorum è Gente POTOCCIANA Octavus supra decimum, (k) eam, quam à Magno Parente suo hausit gloriam, non modo ad posteros transmisit, sed etiam majoribus virtutis suæ illustravit monumentis. Nam præterquam, quod omnibus Senatore dignis instructus esset Virtutibus, ad res tamen bellicas ita à natura comparatus fuit, ut nemo illo aut in pugnando fortior, aut in agendo celerior visus fuerit. Corpore quidem parvò fuit, sed ita tamen à natura compactò, ut laborum omnium esset tolerantissimum. Hoc ille, quod à natura habuerat, sic confirmarat, sic exercitatione auxerat, ut unus esset, cui labor omnis voluptas esse videretur. Non illum hyemis, non æstatis vis, non pluviarum, ventorum, niviumque injuriæ ab incæpto unquam retardârunt. Labores omnes non solum non subterfugiebat, sed etiam ultro appetebat: hocque suò pulcherimò exemplò ita omnium militum ad subeunda quævis pericula accendebat animos, ut nemo

E in to-

(k) Mnitzsch Marschalcus Cu-
ria Regni in sermone Funebris habito | Stanislæopoli Anno 1751.

in toto esset exercitu, qui cum Imperatorem ipsum nulla in re sibi parcentem videret, non ultra vires etiam omnia toleraret. Hic, cum adhuc Palatinum Kioviæ ageret, plurimis suis velitationibus ita Cosacorum, aliorumque rebellium rusticorum attrivit turmas, ut publico Senatus decreto (1) pro hoc Reipublicæ integritatis salutisque civium conservandæ ardore & Sudio maximæ ei haberentur gratiæ. Cum Svecis quoque plurima commisit prælia, varioque Marte & fortunâ sæpius confligit; illud tamen ex omnibus illius operibus bellicis singulare est, quod ad Cracoviam septingentorum nonnisi militum manu septus, ingentem Svecorum exercitum non modo fortiter sustinuerit, sed etiam ita reprefferit, ut ipsi hostes incredibilem ejus fortitudinem animique magnitudinem admirati, ad eum omnem victoriæ laudem detulerint, Imperatoremque avi sui incomparabilem pronunciaverint. Neque tamen bellicis solum artibus, pacis etiam Studiis clarus fuit. De Republica ita semper bene sensit, ut Civem optimum decuit, saluberrimis suis consiliis ita eam juvit, ut Senatorem oportuit. Nulla ejus aut major aut jucundior occupatio fuit, quam omnia sua Studia ad Reip. utilitatem conferre, de illa diu noctuque cogitare, & omnium animos voluntatesque ad id inclinare, quo Patriæ commodis provideretur, salus publica stabiliretur, & Leges Majorumque instituta majorem in modum observarentur. Literarum quoque Studiorumque in Republica amplificandorum quàm beneficus & amator & Fautor fuerit, Collegium nostrum Varsaviense Nobilium testatur, quod tantâ, quoad vixit, complexus est benevolentiam, ut illud & Regi & Reipublicæ commendare nunquam destiterit, & insigni pecunia ad exornanda quotannis pro ludis scenicis theatra, in quibus ad detestanda vitia, moresque ad probitatis, honestatis, virtutisque regulas exigendos Nobilium Adolescentium informarentur ingenia, liberalissime impertierit.

Hæc

(1) Jawne światu Polskiemu od owskiego, Starosty Halickiego zaśluga wielkich Przodków W. Józefa na Stanisławowie Potockiego Woiewody Ki- &c. &c. Konstytucya 1703.

Hæc itaque omnia, quæ de his clarissimis Imperatoribus brevi narratione percensere potui, quantum splendoris Tibi, Familiæquæ Tuæ tribuant, satis à me hucusque si non pro dignitate Tua, at certe pro mediocritate ingenii mei demonstratum esse existimo. Jam vero de ANTONIO Belzenfi Palatino ob insignem eruditionem, eloquentiam, cæterasque præstantissimas tanti Senatoris virtutes, hac nostra ætate bene cū paucis conferendo; STANISLAO Palatino Kioviæ magnæ probitatis & authoritatis in Republica Viro, EUSTACHIO Pincerna Regni, NICOLAO Kanioviensi, JOACHIMO Leopoliensi, JGNATIO Novosielscensi, MARIANO Graboviensi, FELICE Krasnostaviensi, ANTONIO Blonscensi Præfectis, aliisque ornatissimis Familiæ Tuæ Viris, ex quibus nemo non egregius, nemo non in aliqua re magnus est repertus, multa profecto haberem, quæ in medium proferre possem; sed cum hæ communes omnibus, qui POTOCCIANO Sanguine censemini, sint laudes, consalto itaque eas prætereo, non quod multa & præclara de illis dici nō possint, sed ne de illis ita dicere videar, ut in Te nihil jam esse putem, quod de Te dici jure possit: atq; ad has accedo, quæ Tuæ sūt, Tibique propriæ, qualisque non solum ex claritate Generis, sed etiam ex Tuis meritis animique ornamentis huic dignitati Senatoriæ accedat lux, jam indicare propero.

Atque dum de Tuis maximis erga Remp. hanc nostram meritis, quibus eam cumulatissime ornasti, dicere primum incipio, utinam mihi tanta affulgeat dicendi vis, quâ Tuas res præclare gestas copiosa Oratione complecti possim; tantus enim sese mihi dicendi aperitur campus, rerumque pulcherrimarum ubertas, ut in tanta laudum Tuarum segete quid primum, quid postremum mihi dicendum sit, plane ignorem. Audebo tamen & si dicendo non consequar, Tuorum me meritorum excusabit magnitudo, quæ tanta in Te est, ut omnem Eloquentiæ superet ubertatem.

Duo genera sunt, quibus de Rep. mereri possumus, alterum belli, pacis alterum. Quod vero præstantius sit altero, & Reip. utilius, certant inter se illi, qui de Rep. di-

sputant, plurimique inter eos bellica Studia pacis otio præferre non verentur. Ego vero multis rationibus adductus, gravissimorumque virorum judiciò fretus, tantum abest, ut ea secum conferam, ut potius pacem bello semper anteponam, non modo quod pacis tempore reflorescant omnia, quæ bellica ambussit flamma, sed quod etiam studia literarum, quod longe majus est, & leges vigeant, commercia, artesque omnes floreat, religio denique majorem in modum propagetur. Ipsi nos, qui in Polonia vivimus, & pace tam longa fruimur, quod quidem totum primum Deo. Op. Maximo, deinde AUGUSTO III. Regi Clementissimo, qui nos securos ab omni hostium metu vivere jubet, in acceptis referre debemus, intelligere facile possumus, quid belli pacisque fructus Regnis & Rebus publicis emolumentum adferant. Unde & urbanos (m) Magistratus tanto magis militaribus anteponendos esse judico, quod illi potius ad pacem, hi vero ad bellum miscendamque armis Remp. semper propendeant, istique in tuendis imperii finibus, illi in regendis sint occupati. Quamvis autem in utrisque magnam inesse oportere prudentiam, rerumque gerendarum notitiam existimem, in Urbanis tamen requiri maximam contendo, non solum, quod parva sint arma foris, Tullio teste, nisi sit consilium domi, sed quod ambitu suo omnes illas quodammodo complectatur artes & dotes, quæ militaribus inesse censeantur Magistratibus. Isti enim dum Rempublicam gubernant, cum quo & ubi bellum gerendum, qui hostes à finibus arcendi, cum quibusque ineunda fœdera sint, decernunt, illi vero, quæ isti jusserint, exequuntur. Sed cum, plusquam opus fuerit, ab instituto meo recesserim, eo itaque unde abii, redeo, illudque certissime affirmo, tam in militari quam civili vita plurimas inesse vias ad bene merendum de Republica. Cæterum cum de re militari nihil

(m) Sed cum plerique arbitrentur res bellicas majores esse, quam urbanas, minuenda est hæc opinio. Multi nostri bella sæpè quaesierunt propter gloriæ cupiditatem, atque id in magnis animis ingeniique plerumque contingit, eoque magis, si sint ad rem militarem apti, & cupidi bellorum gerendorum. Verè si volumus judicare multæ res exstiterunt urbanæ majores, clarioresque, quam bellicæ. Cicero de Officiis. lib. 1. cap. 22.

nihil mihi sit agendum hoc loco, de iis itaque artibus, quibus de Patria merentur illi, qui in castris & armis vitam ducunt, nihil in præsentia dicam; de vita vero Civili cum plurimus mihi sit instituendus hic sermo, in hoc itaque argumento tota hac orationis parte dum morabor, ut uberiores mihi ad dicendum de eo campum aperiā, in tribus potissimum rebus studium de Patria bene merendi in vita Civili & urbana situm esse statuo: in muneribus videlicet & Magistratibus bene gerendis, in consiliis sententiisque salutaribus Reipublicæ dicendis, & in omnibus occupationibus suis ad utilitatem ejus referendis. Dicam id brevius & clarius: bene gerere Magistratus, bene consulere Patriæ, & omnia ad utilitatem ejus agere, hæ sunt viæ, quibus latissimus cuivis de Patria bene merendi proponitur campus. Quæ omnia, quoniam egregie ad instituta Reip. nostræ conformata esse videntur, quam mirifice ILLUSTRISSE PALATINE es in Te complexus, jam animus est mihi indicare. Sed hæc dum de Te prædicabo, nolim ita de me opineris, ut Tibi quoque Martialem animum inesse dubitem, Teque etiam ad res bellicas gerendas accommodatissimum esse non existimem. Novi ego Tuam optimam indolem ad omnia summa comparatam, omnibusque præsidiis naturæ & artis liberalissime instructam, sed potius id à me conditioni temporum adscribi putes, quod scilicet in hæc incidisti tempora, quibus Regnum nostrum ab omni belli suspicione remotum suavissimo diffuit otio, ut bellicis etiam studiis Tuam illustrare non potueris virtutem.

Quare dum à Magistratibus muneribusque præclare à Te gestis merita Tua in Remp: dictione mea percensere cupio, primò statim locò offert sese mihi illa celebris Tua ad ANNAM Imperatricem Moscoviæ Legatio, quâ ita prudentissimè & diligentissime es perfunctus, ut ex ea non modo Respublica plurimum emolumenti cæperit, sed etiam & Tu ipse maximum gloriæ fructum retuleris. Cum enim Legationis munus non modo in hac nostra Rep: sed in omnibus quoque Gentibus & Regnis honestissimum semper atque amplissimum habitum sit, huic

itaque tam præclaro muneri gerendo nullus unquam præ-
ficitur, nisi qui idem sit honestissimus & clarissimus. Nam
qui Legatus mittitur, is non jam particulam Reip: sed to-
tam ipsam Remp: suis prope humeris sustinere, Regis Ma-
jestatem, Senatûs authoritatem & gravitatem ac universæ
Reip: faciem secum ferre videtur, ut id munus incredibi-
li quadam & gravitate & virtute egeat, & eloquentia, &
assiduitate. Tu itaque JLLUSTRIS: PALATINE ita Te
in hoc gravissimo munere gessisti, ut in tractanda Reip:
causa, & in exequendis Regis, totiusque Senatûs manda-
tis, nemo unquam aut diligentiam, aut industriam, aut
facultatem dicendi desideraverit. Splendorem quoque ac
magnificentiam comitatûs Tui, in qua maxima Reip: hu-
jus dignitas est posita, ita omnes sunt admirati, ut ex Te
uno divitiæ & opes quales in Polonia essent, facilem con-
jecturam facere potuerint. Hinc cum ANNA Impera-
trix illa Moscoviæ Tuam incredibilem in agendis pruden-
tiam, consilium, industriam, gravitatem, animi magnitu-
dinem, cæterasque ingenii Tui dotes, quæ se in ore & vul-
tu Tuo explicabant, advertisset, tanto Te amore est com-
plexa, ut, dici nequit, quantum illa tibi honoris & obser-
vantia detulerit. Nam non modo in omnibus Imperii
sui negotiis familiariter Te est usa, sed quod mirum est,
toto hoc tempore, quo in Aula ipsius versatus es, tantum
Tuo ingenio & prudentiæ tribuere visa est, ut nihil sine
Te aggredi, nihil sine Tuis consiliis moliri quidquam vo-
luerit. Ex quo quantam Patriæ imprimis, quod talibus
sit referta viris, ut etiam illos apud quos perhospitantur,
eorum consiliis uti non pudeat, & Tibimetipsi compara-
veris gloriam, nihil dico. Testis est ipsa Moscovia, quæ
Te apud IMPERATRICEM suam tantis in deliciis fu-
isse vidit, ut non plus Cleopatra Antonium, Artemisia
Mausolum, quàm illa Te amare crederetur, Tuamque hu-
manitatem, gravitatem, summam vultus ac sermonis co-
mitatem, prudentiam, ac ingenium summis hodie dum
celebrat ac extollit laudibus. Testes quoque sunt illæ
dignitates, quas ex hac Legatione redux, quasi totidem
testimonia Tuæ optimè navatæ Reip: operæ in Polonia
retuli-

retulisti, de quibus, quam gloriose eas geras, non est mihi opus multa dicere, ipsæ enim per se loquantur, quam diligenter eas administres. Tibi Præfectura BELZENSIS restitutam in Foro Justitiam, fortunas inopum à potentioribus vindicatas, Civitatem pristino splendori redditam, Nobilitatemque in suo honore conservatam in acceptis refert. Quam vero INCISORIS Regni munere cohonestatus præclare illud gesseris, omnium de Te testantur voces, ut Tuam in eo fidem, vigilantiam, & industriam Respublica nunquam desideraverit. Sed mihi jam longe copiosius de Tuis dicendi laudibus sese offert argumentum in Mareschalci munere, quò cum in Tribunalibus Regni Petricoviæ & Lublini, tum in Juridico causarum Militarium Radomiæ Conventu es functus. Si quæ enim ad Virorum illustrium commendationem afferri potest major laus, certe illa est maxima, quæ à Justitia petitur. Justitia enim cæterarum omnium virtutum quasi quædam parens & altrix est, sine qua neque quisquam aut temperans, aut fortis, aut prudens fieri potest. Hæc est societatis humanæ vinculum, pietatis ara, innocentiae propugnaculum, honestatis præsidium, quæ homines in Cælo collocat, ac Diis ipsis, ut Tullius inquit, simillimos reddit. Quid enim est aliud Judicem agere? nisi vitæ, salutis, fortunarumque Civium arbitrum esse, à cujus potestate dignitas, fama, existimatio, & omnis felicitas populorum vel infelicitas pendet. Quare siquod beneficium Reip: præstari potest, illud profecto est unicum, si illi, qui Judicia publica exercent, ita Justitiam administrant, ut neque tenuiores propter imbecillitatem circumveniri, neque potentiores invidiâ opprimi, neque vitia cum virtute certare, neque honestatem cum turpitudine commaculati patiantur. Quod si quod omnibus numeris absoluti Judicis exemplum in Rep: nostra unquam visum fuit, certe Tu JLLUSTRIS: PALATINE unicus in ea reperi-tus es, qui ita omnes Optimi Judicis obijsti partes, ut id ante Te fecerit nemo. Nam cum duo omnino sint, quæ Justitiam magnopere impedire soleant odium atque amor, quorum primum ad vindictam, alterum ad benevolentiam

am sitpronum, qui itaque odio inducti nihil injusti egerint, perpauci admodum, qui amore, reperti sunt pauciores. Tu vero, quamvis ego Te amicorum amantio-rem neminem novi, qui suos ita dilexerit, & eousque amore proveheretur, ut nulli rei, nulli labori, ut illis obsequeretur, parceret, ita intra Justitiæ fines semper permansisti, ut neque amicorum neque inimicorum, quamvis illos nunquam habueris, sed æquitatis & Justitiæ rationem semper haberes. Quis porro existit, qui Tuam in hoc munere obeundo diligentiam & sedulitatem quandam incredibilem non sit admiratus? Te Mareschalco Auditoria summo mane aperiiebantur; Tu summò mane curiam ingressus accuratissime & diutissime querelas omnes audiebas, lites componebas, stipendia emeritis militibus adnumerabas, omnesque causas tanta prudentia, industriâ, & moderatione animi solvebas, ut nec reo, nec actori fieret injuria. O! præclaram Tuam bene de Reipublica merendi voluntatem, quâ ita ad labores pro utilitate Patriæ tolerandos, ad justitiam bene administrandam, ad honestatem, fidem, diligentiam in Magistratibus gerendis quærendam accendis, ut nemo esse possit, qui Tuis vestigiis pulcherrimisque exemplis insistere non cupiat. Sed jam alterum meriti Tui de Rep: genus, quod est in consiliis sententiisque Reip: salutaribus dicendis, videamus. Nullum siquidem majus ac præstantius Reip: beneficium præstamus, quam si ei, ut ait illud gravissimum Romani Senatûs lumen Cicero, bene semper ac recte consulimus.

Cum duo præcipui in Polonia nostra Ordines sint, Optimatû & Nobilitatis, quorû alter authoritatis, libertatis alter tenacissimus, hicq; variis conversionib', ille vero multis factionibus sit obnoxius, inde fit, ut in tanta ingeniorû varietate studia partiû crescant, opiniones plurimorû in diversa distrahantur, & omnia Consilia irritò eventu, magnoque Reip: cum dispendio dilabantur. Dissidentes itaque ad concordiam unionemque animorum revocare, lites, & jurgia componere, omnesque eloquentiæ nervos in id intendere, ut saluberrimis consiliis Reip: prospiciatur, Leges,

majo-

majorumque Instituta servantur, auctoritas Senatûs, Nobilitatisque libertas intra suos fines contineatur & publica utilitas nullum detrimentum patiatur, hoc certe est aper-
tissimum argumentum Civis Patriæ suæ amantissimi, Vi-
rique prudentiæ & Consilii plenissimi. Ad quas quidem
res perficiendas Tu JLLUSTRIS: PALATINE non hu-
mano sed Divino quodam, & à natura ipsa informatô in-
geniô præstitisse mihi videris. Etenim in omnibus pu-
blicis ac privatis Regni nostri consultationibus, nihil un-
quam nisi Reip: incolumitatem & dignitatem spectasti,
neque partem aliquam ejus, sed ut Sapientes Medici solent,
totum Corpus curare consuevisti. Si frequentissimæ in
Comitiis Nobilitati de maximis rebus consilium dandum
fuit, præclare & egregiè sensisti, si de Rep: sententia Tibi
dicenda, audacter & fortiter dixisti, si lex svadenda, vel
dissvadenda erat, summa contentione semper egisti. Cum-
que multa præterita meminisses, præsentia omnia accu-
ratissime perpenderes, & rerum inter se nexum ac conse-
quentiam quasi quandam diligentissimè considerares, ne-
mo Te aut futura acrius conjectari, aut conjecturâ minus
falli semper est visus. Eâ vero verborum gravitate, ea
Orationis dignitate utebaris, ut, quamvis id nullis illece-
bris nulloque artificio aucupareris, nemo tamen vehemen-
tius in quam vellet partem, audientium animos impelle-
ret, in nulliusque sententiam frequentiora Senatûs Consul-
ta fierent. Atque quemadmodum Athenis Demosthenis
dicendi vim fulmenque Orationis nihil quidquam magis
infringere potuit, quam gravitas Phocionis, ita ad redu-
cendos male de Republica sentientium animos, compe-
scendosq; in Consiliis Judiciisque litigantium clamores, &
importunas obstrepentium rabularum voces, tantum Tua
semper valuit autoritas, ut id, quod Tu velles, omnes
cuperent, quod Tu svaderes, omnes desiderarent, quod Tu
faceres, omnes ambabus, ut ajunt, ulnis complecti vide-
rentur. Quod quidem eo facilius consequeraris, quod
egregius Tuus quidam in Remp: amor, semper omnibus
esset perspectissimus. Sciebant enim omnes Te nulla
privata re, nullis Tuis unquam moveri commodis, non

amicitiis perverti, aut inimicitiis perturbari, nihil in gratiam cujusquam loqui, nihil dies noctesque cogitare, quam quemadmodum Reip: prodesse posses, nihil dicere, quod non Reipublicæ utile videretur. Hinc tanta ubique veneratione & existimatione pollebas, ut in Te omnes & amorem hunc Reip: incredibilem, studiumque in prospiciendis illius utilitatibus ardentissimum, & de Tua in conficiendo celeritate, in agendo industria, in providendo consilio plurimum confisi, gravissima Tibi sæpenumero Reip: negotia committere, maximaque ad Te deferre munia non vererentur. Cumque omnes Poloniæ Provinciæ de Te quodammodo inter se certarent, omnesque Te ad sua pertractanda negotia publicosque Magistratus gerendos pertrahere conarentur, evicit tandem Nobilitas Belzenfis, dum Te Oratorem perpetuum ad Comitia, Judicemque ad Tribunalia Regni, quoties id velles, eligendum publico & unanimi omnium sanxit decretò. Qui quidem honos, quemadmodum ante Te habitus est nemini, ita etiam apertissime declarat, Te esse summo Consilio, gravitate, industria, & in quærenda Reip: salute diligentia, studio, & amore incomparabili. Quare jam mihi de tertio merendi de Rep: genere in præsentia est dicendum. Nam si magnum Reipublicæ beneficium præstamus, si Magistratus bene gerimus, majus si ei recte consulimus, profecto istud est maximum, si ita ei studemus, ut omnes curas occupationesque nostras ad utilitatem ejus referamus. Quo quidem in genere adeo Tu ILLUSTRIS: PALATINE es admirabilis, ut Te in eo si non omnibus præferendum, saltem cum paucis conferendum esse putem.

Multi enim consilio, opibus, & eloquentia valere, sed illis aut nihil Reip: profuerunt, aut in ejus perniciem abusi sunt. Alii quoque fuere, qui publicè bene & præclare de Republica senserunt, privatim vero turbis & factionibus eam miscuerunt, atque, quemadmodum de Cicerone verene an falso traditur, aliud stando aliud sedendo de Rep: cogitaverunt. Qui autem privatim & publicè, domi & foris, integritate, industriâ, consilio, ingenio, præstiterint, amoreque conservandi Reipublicæ splendoris

doris flagraverint, pauci admodum fuere, qui in hac nostra Rep: versati sunt: adeo ut Tu JLLUSTRIS: PALATINE, unicus hanc nostram ætate inventus sis, qui omnem Tuam operam utilitati Reipublicæ impendis, qui eo omnes Tuas curas cogitationesque confers, quò illi prodesse, de eaque mereri possis. Nulla enim Comitia, nulla Senatûs Consulta, aut Judicia unquam peracta sunt, quibus Tu non interesses, & quid de Republica sentire, non diceres. Te neque viarum incommoda, neque àëris, tempestatumque injuriæ, neque valetudinis etiam propriæ, quàm nihil carius jucundiusque homini in vita constituto esse debet, ratio, ab hac unquam dimovere poterant sententia, quin illis adesses consultationibus, in quibus de Reipublicæ utilitatibus, de fortuna & salute civium ageretur; memorque illius, quantum Patriæ deberetur, vitam etiam ipsam cariorem eam habebas. Tu privatim & publicè semper in id intentus esse observabaris, ne aut Republica detrimenti aliquid caperet, aut Regis Majestas, Senatûsque authoritas imminueretur, aut Nobilitas de libertate sua periculum faceret. Quod quidem ardentissimum Tuum in Patriam studium maximè tunc probasse mihi videtur Sapientissimus Rex noster AUGUSTUS III., quando Te Insigni Equitum Albæ Aquilæ condecoravit: quantum enim Tibi in Fide tuenda, Rege & Legibus defendendis deferret, hoc eximio judicii sui de Te testimonio cumulatissime declaravit. Cum nullo Tibi siquidem majores unquam inimiciæ fuerunt, quàm cum illis, qui aliquid aut contra Rempublicam moliri, aut Leges Patrias & instituta majorum infringere & convellere audebant. Hos tamen ut ad meliorem frugem reduceres, amoremque Reipublicæ & observantiam Legum instillares, nullum non movebas lapidem, sed quàm minis, quàm precibus, muneribus etiam & promissis suaviter & humaniter inducebas, ut id, quod rectum, honestum, & Patriæ utile foret, sentirent, & facerent. Atque quod alii ad libidinem & luxum, ostentationemque opum suarum facere consueverunt, Tu si quando mensas auro argentoque graves instruebas, aut convivia splendore & magnificentia plane

tegia apparabas, non alium in finem id facere semper videbaris, nisi ut hac ratione animos omnium, benevolentiamque Nobilitatis Tibi conciliares, ut inter pocula & mensas majorem de Patriæ utilitatibus dicendi copiam haberes, rerumque pulcherrimarum narratione, & dictorum à Te quasi satietate quadam inescatos, ad agendum & consulendum id Patriæ, quod ei utile esset & pernecessarium, induceres. Faciebas sanè id, quod de Cyro Persarum Rege accepimus, qui Persarum animos servitute ciborum & dulcedine epularum conditos à servitute Medorum revocavit, & ad quærendam armis libertatem pellexit; atque ut tanto magis omnium in Te voluntates delinires, nullis unquam in conviviiis parcebas sumptibus, quin id, quod desiderares, efficeres, & in id, quod utile Patriæ rebaris, omnium sententias inclinares. Sed neque domi solum, foris etiam utilitatem Reipublicæ quærebas. Cum Regibus & Imperatoribus amicitias inibas, ut tanto magis pacem Reipublicæ firmares, & eam ab omni hostium metu securam redderes. Qui quidem quo Te in honore habeant, nuper vidimus, cum Legatus Turcarum ad potentissimum Regem nostrum missus ex Legatione redux Te adiisset, Teque de amore & benevolentia Imperatoris erga Te sui certiore fecisset. Quæ profecto omnia tam præclara & magnifica amoris studiique Tui erga communem hanc Patriam nostram sunt testimonia, ut nemo tam iniquus rerum æstimator sit, qui Tibi optime meriti de Patria Civis honorem non deferat, Teque inter præstantissimos, clarissimosque Reipublicæ hujus Viros non reponat.

Quantum itaque splendoris dignitati huic Senatoriæ meritis Tuis in bene gestis Magistratibus, in bene Patriæ consulendo, & omnia ad utilitatem ejus referendo attulisti, si non copiosè, at certè sufficienter satis hucusque ostendi; nunc ex pulcherrimis animi Tui ornamentis, de quibus ultimo loco dicendū mihi proposui, quantū ei accedat lucis, jam aliquid mihi differendū esse judico. In quibus celebrandis is ero, qui potero, Tu, si minus satisfecero, ignoscere, atq; ita existimare debebis, mihi in hac amplissima ad dicendum proposita materia non voluntatem, sed facultatem defuisse.

Quod

Quod quidem laudationis Tuæ argumentum dum aggredior, latari & exultare quodammodo sibi videtur oratio mea, quod jam scilicet ad eam pervenerit partem, ex qua splendidissimum rebus à me hucusque pertractatis affulget lumen, & lux quædam oboritur. De virtutibus namque Tuis ILLUSTRISIME PALATINE jam dicere incipio, quas antequam Senator fueras, omnes tamen Senatorias in Te habebas. Tria (n) enim in Senatore requiruntur: scientia, diligentia, & memoria. Ad scientiam ego quidem, quæ in in quovis Senatore Reip. nostræ summa esse debet, præter multarum disciplinarum notitiam, artem seu facultatem Oratoriam, ut persuadere possit, primò locò pertinere puto; ad diligentiam assiduitatem quandam & sedulitatem in agendo; ad memoriam denique ea omnia revoco, quæ Senatori in promptu semper esse debent: ut nimirum non modo Leges, consuetudines Patrias, & instituta Majorum memoriâ retineat, sed ut etiam exterarum Gentium mores, historiam, vicissitudinesque Regnorum apprime noscat, quorum exemplis abunde instructus, quid Patriæ svadendum quid dissuadendum sit, probe sciat. Hæc omnia Senatorum ornamenta, quam mirifice sis in Te complexus, semperque ea in Te habueris, ubi reliquo orationis meæ cursu indicabo, tute ILLUSTRISIME PALATINE, si per modestiam Tibi licebit, fateri debebis, Te omnia dignitatis Senatoriæ decora Tecum adferre, non illamque Tibi, sed Te illi splendorem tribuere.

Nam præterquam, quod Latinis literis sis optime instructus, & omnibus artium liberalium studiis apprime excultus, lingvarum etiam exterarum tantâ es peritiâ, ut in venustate verborum elegantiaque dicendi cum nativâ jure optimo contendere possis. Quæ quidem industria Tua liberalis profecto & ingenua non modo Te literarum

H

ac

(n) Est Senatori necessarium nosse Remp. idque late patet, quid habeat militum, quid valeat ærario, quos socios Reip. habeat, quos amicos, quos stipendiarios, quâ quisque sit in Lege, conditione, fædere, tenere consuetudi-

nem decernendi, nosse exempla majorum. Videtis jam genus hoc omne scientiæ, diligentia, memoriæ esse, sine quo paratus esse Senator nullo pacto potest. Cicero de Legibus lib: 3.

ac eruditionis amantissimum, sed etiam Reipublicæ studi-
osissimum apertissime declarat. Nunquam enim melius
de Rep. mereri possumus, quàm si ejus dignitatem varia-
rum rerum notitia excolamus & ornemus, nosque natos
non in vervecum patria & crasso sub aere, sed in solo mi-
tissimo, suavissimo, & ad omnem humanitatem & literas
à natura propensissimo declaremus. Huc accedit, quod ho-
mini illustri loco nato, & ad gerendos in Rep. Magistra-
tus comparato, nihil honorificentius utiliusque sit, quam
multarum lingvarum præstare peritiâ; cùm ut ex variorum
librorum lectione, ea hauriat, quæ ei ad vitam Civilem in
Rep. agendam sint pernecessaria, tum ut cum Legatis ex-
terarum Gentium, si qui erunt, conferat, & ne dolo aut
fraude quid agatur, ex servorum aulicorumque verbis &
sermone intelligat. Jam vero ut ad eloquentiam veni-
am, quæ in nostra Rep. in foro, in Comitibus, in Senatu, o-
mnibusque Magistratibus maxime dominatur, ea tam va-
sta, tamque ampla in Te est, ut ob summum ingenii
Tui flumen dicendique ubertatem, Athenas & ipsam Ro-
mam Tecum in Poloniam quodammodo cômigrasse arbi-
tremur. Habes enim eloquentiam, non illam quidem
præposteram, circumforaneam, & elumbem; non illam,
qua in foro utuntur dicacissimi illi rabularum & leguleio-
rum greges, acrem, acerbâ, iracundâ, contentionis, ardor-
is, inimicitiarum, laterum laborum plenam, sed illam
pacatam, sedatam, gravem, hilarem etiam interdum, &
cû dulcē, tum resperfam salibus, simplicem semper & succi
plenam, non minio & cincinnis comptam, verborumque
pigmentis ad ostentationem coloratam, mundam vero &
ipsâ quasi negligentia gratiorem, quamque vere Regiam
ac Senatoriam possim dicere. Itaque sive quidquam pro
Concione dicis, sive in Comitibus Judiciisque ad Nobilita-
tem verba facis, tantus statim exuberare videtur dicendi
fons, ut prope unus omnium Oratorum omnem vim, o-
mnes illecebras, omnesque, ut ita dicam, veneres exhausisse
videaris; tanta, inquam, se effundit eloquentiæ Tux uber-
tas, ut neque ad fidem, neque ad gravitatem Orationi Tux
quidquam deesse aut desiderari possit. Quæ quidem Tua
hæc

hæc tam præclara atque Senatoria sane eloquentia eo etiã in Te est admirabilior, quod si quãdo, ut in statu populari fit, ad subitas aliorum invectivas, actionesque inopinatas respondendum Tibi erat, ea Tu talia pro re nata atque tẽpore in medium afferebas, qualia, si optimi atque clarissimi Oratores diu culta elaborataque adduxissent, nunquam fuissent meliora. Quæ vero Tecum ipse ante commentabaris, & magna aliqua in re atque causa ad dicendum accedebas, ea sic tractabas, ut cum omnibus artis præceptis institutisque uteris, nullum disciplinæ aut Scholæ, nullũ industriæ vestigium appareret; adeo ut ea, quæ ipse cogitares, sentires, in aliorum mentes atque animos ita transferres, ut impressa non tradita, innata non insita, propria non aliena viderentur. Sed hæc de eloquẽtia satis; de diligentia jam in agendis, quæ est altera Senatoris dos & virtus, qualis nempe in Te semper illa fuerit, pauca dicam.

Si quid est, quo Regna & Respublicæ bene quantumvis ordinatæ labefactari, & ad perniciem vergere consueverunt, illud profecto est negligentia Magistratuum, & segnis bene administrandæ Reip. cura. Hoc profecto fuit, quod florentissimum aliàs totâque Africâ clarissimum Carthaginensium Regnum, quod cum Roma ipsa de principatu multis annis armis contendere non est veritum, evertit, & omnem ejus splendorem bellicis insepelivit cineribus. Dum enim omnes illius cives, non tam de Rep. defendenda, quam de mercatura pertractanda, corrogandisque ex commerciis opibus cogitarent, Romani nimio plus Carthaginis delendæ soloque æquandæ desiderio inrenti, ubi copiam nacti sunt, funestis affectam cladibus, plurimisque attritam bellis, ita à pristino deturbarunt splendore, ut deinde misere cõciderit, & in potestatẽ Romanorũ redacta fuerit, Ipsum denique Romanum Imperium, dum in Magistratibus pro libidine & ingenio suo quisque ageret, primũ armis civilibus divexatum, pòst negligentia & desidia Imperatorum à Barbaris occupatum, interque crudelissimos Reges discerptum, ita ad incitas redactum fuit, ut ne vestigium illius Imperii totò orbe celebratissimi apparuerit. Quare ad conservandas, & ab interitu

vindicandas Respublicas nullum aliud majus præstantius-
que me hercule reperiri potest remedium, quàm si ii, qui
Magistratibus præfecti sunt, diligenter eos administrent,
in omnemque partem intentos oculos habeant. Quæ
quidem diligentia magna in omnibus Magistratibus, in
Senatoribus tamen summa requiritur, tum quod illi pro-
pter authoritatem Ordinis sui principem locum in Rep.
obtineant; tum quod salus Reip. in consiliis eorum sita sit.
Quare gratulari sibi quodammodo debet Respublica no-
stra, quod Te illum nacta sit Senatorem, quò in obscundis
Magistratibus nemo diligentior unquam est repertus. Nam
ne repetam illa, quæ de Te superius jam dixi, quis tantâ
diligentiâ, labore, assiduitate, & industriâ Magistratus ges-
sit, ut oblitus plane sui, commodorumque suorum, to-
tum se illis impenderet? Quis eo in Remp. ferebatur a-
more, ut propriis occupationibus posthabitis, omnem cu-
ram cogitationemque suam eo conferret, quo illi prodesse
posset? Tu, tu solus es ILLUSTRISSE PALATINE, qui
neque laboribus ullis pepercisti, neque somno indulgisti,
neque difficultates omnes unquam abhorruisti, quin Tuo
bene fungereris munere, eaque ratione, qua posses, Reipu-
blicæ utilitatem adferres. Legationes Tuæ, quibus cum
ad Moscoviam, tum ad omnes Reip. Ordines sæpius fun-
ctus es, Magistratus Tui, quos variis temporibus præclare
gessisti, apertissime declarant, & quasi totidem dictorum
à me sunt testes, Te esse tantâ in rebus agendis diligentiam,
ut ad Tuam prudentiam, vigilantiam, industriam, labo-
rem nihil quidquam desiderari possit. Ex his itaque ali-
isque amplissimis de Te testimoniis, quâ diligentiam & seduli-
tate dignitatem Senatoriam sis gesturus, nemo est, qui
dubitet.

Jam vero de his dicturus, quæ ad memoriâ tertiâ Se-
natorum dotem revocantur, quanta Deus bone de Te mi-
hi dicendi sese offert ubertas! Nam ut ab Historia vita
memoriæ, & magistra vitæ, ut inquit Tullius, incipiam, quis
tam præstanti tamque divinò ingenio fuit, ut res ab orbe
condito gestas tanta tenacitate memoriæ complecteretur,
& inter tot tantasque curas, sollicitudines, occupationes-
que

que Reip. tam accuratè memoriâ retineret ? Tu autem quidquid unquam gestum à quoquam est, quidquid perpetratum, quidquid literis mandatum Græcis vel Latinis, sive ex Hebræorum Historia, illa quidem perantiqua perqueveteri, sive ex historiis, quarum res gestæ post fuerunt, sive denique ex recenti atque nova, ea omnia non solum diligentissime legisti, & accuratissime didicisti, sed etiam semel lecta vel audita ita semper ante oculos habes, & quasi insculpta in animo Tuo retines, ut nihil Tibi unquam eorum excidat. Nullæ Gentium commotiones, nullæ exercituum comparationes, nullæ classes, nullum bellum aut pugna, nullum egregium facinus aut dictum paulo excellens in literarum monumentis reperitur, quod vastissimæ memoriæ Tuæ septô non contineatur. Mira quidem, & fidem ipsam excedentia de Te dico, sed ea silentiô præterire, quæ verissima sunt, nefas esse judico. Hoc enim memoriæ Tuæ singulare est beneficiû, ut ea omnia, quæ legeris, aut semel audiveris, quasi iisdem verbis in illam transcriberentur, ita ordine, situque suo permanent, ut nullô temporis spatiô aut longinquitate deleantur. Itaque ut rem totam paucis concludam, omnes actiones, omnia tempora, omnia clarorum virorum illustriumque sæminarum nomina, quacunque demum in re excelluissent, ita Tuæ inhærent memoriæ, ut Te ipsum vel omnes omnium Gentium Annales conscripsisse, vel omnibus sæculis vixisse fateri sit necesse. Et quoniam propter summum rerum usum & utilitatem quasi affinitate quâdam cum Historia illa connectatur scientia, quam Vossius ocellum Historiæ vocat, illa vero bonarum artium Studiorumque omniû inventrix & magistra Græcia Geographiâ appellavit, Tu illâ ita es imbutus, ut neq; Regionû ac locorum situs, nec urbium, insularum, fluminum, non ipsorum fontium nomina, quo victu quæque regio, quibus moribus, quibus artibus utatur, & excellat, quisquam Te accuratius aut scire aut explicare possit. Quid vero Divinas humanasque leges commemorem ? quid patrias consuetudines ? quid Jura Gentium ? quid varias hominum naturas ? quæ omnia ita Tu **ILLUSTRIS-SIME PALA-**

TINE memoriâ complexus es, ut Tibi ad illam perfectissimam artium omnium rerumque cognitionem nihil quidquam deesse videatur.

Et quoniam de Senatoriis dixi, reliquum est, ut & de cæteris præstantissimis Tuis, quæ in Te mirifice resplendent, virtutibus aliquid dicā; quibus recensendis dū aliquantulum immorabor, etiā atq; etiā à Te peto, ne me plus Oratoriè & laudatoriè, quàm verè de Te dicere, & plus eorum, quæ de Te prædicabo, Tibi Oratione tribuere, quàm in Te revera esse arbitreris. Omnia, crede mihi, in Te summa sunt, atque tam excelsa, ut plura à me prætermitti, ne in immensū crescere videatur Oratio, quàm narrari debeāt.

Itaque si mores vitamque Tuam ad Senatoriam hanc dignitatem conferre & conformare voluerimus, neminem profecto reperiemus, qui ad eam propius accedere videatur. Alii enim sunt humanitatis & officiorum plenissimi, sed pietatis in Deum expertes, & voluptatibus vitiisque dediti; alii fortassis sunt prudentes sed iniqui, alii frugi sed superbi, alii clementes sed avari, alii liberales sed crudeles, alii denique pii sunt in Patriam & Parentes, sed amicis injustos & iniquos sese exhibent; verbō: nemo pene unquam talis est repertus, qui non aliqua vitiorum labe, virtutes eas, quibus eminebat, obscuraret. Tu vero ILLUSTRISSE PALATINE omnes virtutes non solum Senatore sed libero etiam homine dignas ita in Te copulasti, ut in illis inusitatus quidam concentus, & mira inter se consensio appareat. Nihil enim in Te humanitas & benevolentia singularis erga omnes pietati in Deum officit, nihil comitas severitati, gravitati bonitas, clementiæ justitia detrahit, sed summus in iis rerum omnium modus moderatioque conspicitur. Quid vero beneficentiam Tuam, affabilitatem, urbanitatem, justitiam, fidem, omnesque eas virtutes, quæ ad humanitatem & facilitatem morē pertinet, cōmemorē? jam pridē hoc illis consecutus es, ut Te omnes non aliter ac communem Patriæ parentem suspiciant, venerentur, ament, & observent. Sive enim in publicis sive privatis negotiis quicumque Te adit, cum Tu tanta hilaritate & amœnitate vul-

tus suscipis, tanta lenitate sermonis & suavitate alloqueris, ut in Tuo ore non jam illæ fabulosæ Poetarum Charites, sed verissimæ omnes Gratiae considerare videantur. Nemo à Tuo conspectu & colloquio unquam excluditur, omnium postulata libenter cognoscis, nihil iusta petentibus denegas, sed omnes votorum compotes pacatosque à Te dimittis. Liberalitatem autem Tuam, quâ multorum inopiam sublevare studes, quæque maxima in Te est virtus & cum paucis conferenda, non est opus cur multis hic commendem: tot enim Basilicæ à fundamentis excitatæ, tot Aræ Divorum nominibus consecratæ, tot Nosocomia ad alendos pauperes à Te exstructa manifestè declarant, Te esse ad testanda omnia pietatis officia à natura propensissimum. Testatur hoc & Collegium nostrum *Varenzense*, quod simul ac in Tuam clientelam & patrocinium suscepisti, tantos, tamque uberes Tuorum in se meritorum experitur fructus, ut pro maximis benevolentiae Tuæ sibi exhibitis testimoniis semper gratam Tui memoriam gerat, eamque sibi de Te polliceatur fortunam, qualis de tam liberalissimo, munificentissimo, & ad omnem beneficentiam & humanitatem à natura instructo sperari debet Senatore.

Ex his itaque, aliisque præclaris animi Tui ornamentis, quæ, dies me deficeret, si singula Oratione perconscribere cuperem, quis jam non videt, quem splendorem dignitati huic quam Tibi in præsentia gratulamur, tribuas? O! Virum ætatis nostræ decus, & clarissimum sæculi nostri lumen, cui tanta & naturæ, & ingenii, & fortunæ data sunt ornamenta, ut illorum splendidissima luce non modo Clarissimæ Gentis Tuæ POTOCCIANÆ, sed totius etiam Patriæ illustrares nomen! Quod tantum ingenii flumen, quæ tanta facultas, dicendique vis esse potest, ut Tua pulcherrima facta præstantissimasque animi dotes Oratione complecti valeat? Omnia in Te tam summa, tam excelsa, tam sublimia, ac magnifica sunt, ut nemo jam profecto esse possit, qui Te claritate Generis Tui, magnitudine meritorum, innumerisque animi Tui ornamentis Senatoriæ huic dignitati splendorem attulisse dubitet.

Quare cum tantis animi & fortunæ instructus decoribus Palatinos capeffas fasces, quî fieri nunc potest, ut, illos fructus, illaque emolumenta Reipublicæ prospiciendo, quæ sibi omnes boni ex hoc Tuo præclaro Magistratu non divinantur jam sed certo pollicentur, ab inusitata temperemus lætitia? deque amplificatione honoris Tui vehementer non gaudeamus? Quis, inquam, erit, qui se in hujus lætitiae societatem offerens, tantumque bonorum omnium consensum ex hac dignitate Tua Reipublicæ afferri videns, Te lingvis omnium non celebret, maximisq; laudibus non ornet? O! Te felicem, & terque quaterque beatum JLLUSTRISIME PALATINE, qui in hæc incidisti tempora, ut tantam totius Patriæ lætitiā, non animo solum persentisceres, sed oculis etiam ipsis usurpares! O! diem lingvis omnium prædicandum, libris, monumentisque ad posteritatis memoriam celebrandum, quò Senatoriā insignitus Purpurā in his affulisti terris, & omnes ad lætandum de hoc Tuo præclaro excitasti honore. Erit, erit hoc profecto non exiguum gloriæ Tuæ monumentum, quod antiquitas non vidit, posteritas mirabitur, Te unum exstitisse, de cujus amplificatione honoris non una Civitas, nō una Provincia, sed universa gavisa est Respublica. Percurre enī si potes animo totā, qua late patet, Poloniā, & omniū sensa volūtatesq; explorando, quid de Tua dignitate sentiant, ipse diligenter adverte. Videbis proculdubio tantā omniū Ordinū, consentientisq; populi lætitiā, ut nemo omnino sit, qui de hoc Tuo præstantissimo nō lætetur honore, suūque erga Te studiū atq; animū non testetur. Lætatur Patria quod Te Parentem suum Optimū, libertatis, legum, Religionisque Christianæ, quā Polonis nostris nihil est antiquius, vindicem & propugnatorem acerrimum est nacta. Miro, & incredibili perfunditur gaudio Senatus, quod Te eum in suum ordinem allectum esse videt, cujus tantam fidem, diligentiam, industriam, laborem, consilium in tot gestis Magistratibus Respublica est experta, ut salutem integritatemque suam à Te defensā & conservatā, Tibiq; acceptā referat. Maximā afficitur lætitiā Equestris Ordo, quod Te illum Palatina digni-

dignitate exornatum conspicit, qui illius Fautor, Defensor, Conservatorque semper exstitisti. Exultat denique & totis quodāmodo subsilit artibus *Volhynia* Provincia, quod Te eum sibi in Rectorem Dei beneficio & munere à Rege concessum esse intelligit, in quem ad obeundas muneris hujus partes, tot & tanta & animi, & corporis, & fortunæ congesta sunt ornamenta, ut neque ad dignitatem suam illustrandam, neque ad gloriam nominis sui amplificandam, aut honorificentius aut dignius quidquam Te esse putet. Atque quod sibi Tecum fortunam, felicitatem, omniumque bonorum consensum affulisse credat, ad testanda lætitiæ, voluptatisque suæ lena, quā se, Civiumque suorum animos demulceri sentit, conformatā quādam ad dicendum voce ita quodammodo ad Te loqui, atque hæc dicere videtur: O! me felicem, quæ ex tot clarissimis præstantissimisque Reipublicæ hujus Provinciis unica reperta sum, ut Te Palatinum, Rectoremque meum haberem! Tot inter se votis desideriisque certabant Provinciæ, ut svavissimo Tuo fruerentur conspectu, & vel uno die Sapientissimi Tui regiminis degustarent dulcedinem, hæc tamen, præter me, nulli contigit fortuna. Ego digna habita sum, quæ os vultumque Tuum semper contempler, quæ præclara animi Tui ornamenta veluti in deposito quodam apud me asservarem, quæ laudibus Tuis viverem, & incredibili rerum à Te gestarum gloriā ad immortalitatem proveherer. Mihi concessum est, ut Te Ducem Principemque Senatūs, Nobilitatisque meæ haberem, Tuique imperii svavissimos degustarem fructus. Accipe me itaque jam in fidē ac defensionē Tuam, Tibi me ego committo, totamque incomparabili Tuæ prudentiæ regendam trado. Tu ut optimus Parens mei curam geras, ut Sapientissimus Senator saluberrimis Tuis consiliis ad incrementum alas, ut amantissimus Patriæ Civis amore & benevolentia me Tuā complectaris. Non ego pericula & calamitates ullas vereor, non hostem reformido; Te Duce, Te Auctore ab omni hostium metu segura vivam, sub Tuoque imperio jucundissimo pacis otio diffuam. Hæc *Volhynia* vox, hic Patriæ, Senatūs, Equestris-

que Ordinis de Te sensus, hoc constans & æquale omnium iudicium, Te esse ita de Republica optime meritum, ita omnibus virtutibus Senatore dignis instructum, ut de Tuo omnes & latentur & gratulentur honore.

Quod si ita de Te JLLUSTRISIME PALATINE universi sentiunt, ita singuli prædicant, reliquum est, ut, cum communis Reipublicæ salutis, tum universæ Provinciæ nostræ utilitatis causâ faustissima Tibi quæque in hac dignitate precemur. Faxit itaque Deus, Ter Opt. Max. ut Tibi omnia in hoc honore ex animi sententia succedant, & quem claritate Generis, magnitudine meritum, pulcherrimisque animi Tui ornamentis Tibi promeruisti, ut cō Patriæ ad columen, *Volhyniæ* ad ornementum, Tibi Familiæque Tuæ ad gloriam, nobis vero totique Ordini nostro ad præsidium sanus & incolumis diu feliciterque fruaris. Hoc Tibi Collegium *Varenzense*, quod voluntatem studiumque suum in Te hac exigua Oratione testatum habere cupiens, Tuo se totum ultro alacriterque committit patrociniò, hoc universa *Scholarum Piarum* precatur Provincia.



